

讀四書大全說

讀四書大全說卷九

船山總書二十

衡陽王夫之謨

孟子離婁上篇

以六律正五音但爲金石絲竹匏土革木之五音言而人聲之五音不在其中蓋人聲之五音一因其自然直是無可用力正得處律之所能正者以立長短大小多少輕重之法而取清濁緩急修促洪細之定則也耳無定準藉數以立質隨質以發聲而八音之宮商角徵羽乃以分焉蓋八音之有響雖天地之產使有可以得聲之材而其成音也必繇人製製之自人則或增或損無成則而必亂故必

以六律一成之數爲之準而合於數者合於音矣若人聲之清濁斂縱一仍乎自然之喉舌唇齒齶一成以還莫之爲而自動於竅雖有六律亦安所施哉此亦不待審樂者而後知也若夫歌唱之節亦有所待以取和則又恃五音已正之八音定其疾徐之度耳故六律者以正五音於八音而八音者又以其五音之叶正人聲之五音也在古樂則房中升歌以瑟餘樂以笙磬於今世俗之樂則南以拍板北以絃索古樂今樂雅鄭不同而人聲之受正於五音不受正於六律一也程氏復心只此不知乃謂聖人制五音以括人聲矮人觀場無勞饒舌可已

有仁心仁聞而民不被其澤唯宋仁宗可以當之其不可
法於後世者則漢文景是已齊宣王不忍一牛孟子許其
足以王者猶謂乍見孺子而怵惕惻隱之人可以保四海
無欲穿窬之人可使義不勝用耳偶然半明半滅之天良
安得遽謂之有仁心耶至若梁武帝者篡其君而推之刃
懼寃報之相尋思以苟免其人誅鬼謫之大罰而又擇術
不審託於無父無君之教以自匿抑且貪非所據憤不自
戢殺人盈於城野毒禍中於子孫正孟子所謂以其所不
愛及其所愛不仁之尤者也乃云天下知其慈仁知之者
誰耶不過游食之髡飽其利養讚歎功德而已若天怒人

怨衆叛親離本紀可考安所得慈仁之稱哉以齊宣愛牛之心而行先王之道若因半星之火欲成燎原之勢自非孟子爲之吹噓播颺之固必不能蓋其一暴十寒之心元自不給於用而擴充之也自非旦夕之功若彼始爲亂賊繼爲浮屠之蕭衍卽使依樣胡盧行井田立學校亦與王莽之效周官以速亾者無以異安所得澤被於民而法垂於後耶范氏於是爲失言矣慶源云武帝有仁聞而非其真差爲近實然衍之惡積而不可揜不仁之聲遺臭萬年豈但失真而已哉

不愆不忘兩不字元是工夫字與無愆無忘不同不以有

意而愆謬之不以無意而遺忘之乃能循用舊章以遵先王之道在詩之以祝王之子孫者固爲願望之詞非有率用舊章者而以贊其無愆無忘之美孟子斷章引此亦正於不愆不忘顯遵法者學古之功不得以不愆不忘爲無過率繇舊章爲遵法逆文立意也遵法而可無過乃孟子引仲詩人言外之旨故曰遵先王之法而過者未之有也以補詩所未言之效若詩已有無過意則當以此之謂也直結之矣集註未安

法律之不可勝用仁之覆天下雖聖人之以爲法於後世者以此乃聖人之自以制器審音平治天下先須用此非

在聖人獨特其耳目心思已足給用但爲天下後世不能如己之不待於法故須與立簡法度也集註似誤看一繼字將耳目心思之既竭作聖人自用之道聖人已自了當後又加上一種方便與後人如此說來未免害理此雖爲上古聖人而言然其云竭目力之聖人者豈其明之過於婁班竭耳力之聖人者豈其聽之過於師曠竭心思之聖人者豈其睿智之過於堯舜則亦但竭其耳目心思終不能制器審音而仁天下於是繼求之一定之法使目有憑以用其明耳有憑以用其聽心有依據以行其仁然後知向之徒勤於耳目之力心之思者必至此而後非妄也規

矩準繩元不是目力看出來底六律元不是耳力聽出來
底不忍人之政元不是師心億度想出來底集註猶以爲
未足一語殊不穩妥豈但以爲未足哉直是耳目心思之
力與形之方員聲之五音天下治平之理全然湊泊不著
規矩準繩因乎象六律因乎數聖人不於目求明於耳求
聰而以吾心之能執象通數者爲耳目之則故規矩六律
之所自制不得之耳目者而得之於心思以通天下固有
之象數此以心而治耳目也不忍人之政上因天時下因
地利中因人情聖人不任心以求天下而以天下固然之
理順之以爲政此以理而裁心思也故仰觀天文俯察地

理察邇言以執兩端而用其中豈有閉門造車出門合轍之自用者哉聖人用之而自不可勝用乃以垂之後世而亦不可勝用其理一其效均也如謂先王爲天下後世故制此法度若聖人之自爲用者一目擊而方圓卽定一流耳而五音卽定一致思而仁卽被於天下則此聖人者將如佛氏之觀十方世界如掌中果一按指而海印發光一皆成就耶言之無實亦不祥矣旣者已事之詞也繼者遂事之詞也已竭耳目心思云者勞已盡而績未成也繼之以規矩準繩六律仁政云者言彼無益而得此術以繼之乃以遂其所事也雙峰乃云唯天下不能常有聖人所以

要繼之不忍人之政然則使天下而恆有聖人則更不須此不忍人之政乎是孔子旣作而伏羲之易唐虞之典殷周之禮皆可焚矣此老子剖斗折衡之緒論釋氏黃葉止啼火宅化城之唾餘柰何游聖賢之門者不揣而竊其旨也

人君之所不得於天下者亦雖不親不治不答以敬而已其以蒞下土而定邦交者亦唯愛之治之禮之而已仁智敬之皆反求矣則亦更有何道之可反求也只此三者包括以盡行有不得者皆反求諸己是總括上文以起下義雙峰乃云上面三句包括未盡皆字說得濶徒爲挑撥了

無實義當亦未之思爾

林氏所云諸侯失德巨室擅權自春秋時事逮乎戰國天下之持權者又不在世卿而在游士矣不修其本而遽欲勝之唯晉厲魯昭齊簡爲然戰國時列國之卿與公室爭疆弱者僅見於田嬰韓朋然亦終不能如三家六卿之疆逆也以蟠根深固之魏冉而范雎一言則救死之不暇七國之貴公子者劣以自保其富貴安得有君欲勝之不能而取禍者哉孟子說不得罪於巨室與周公不施其親不使大臣怨乎不以故舊無大故則不棄也意同乃以收拾人心於忠厚仁慈之中而非有稱兵犯順之王承宗跋扈

不恭之韓氏須爲駕馭不然則效安史滔泚之爲也看孟子說沛然德教溢乎四海則其云爲政不難者爲施德教之令主言也若唐憲宗一流恩威兩詘之君本無德教不足言矣孟子七篇屢言興王業之事而未詳所以定王業者唯此一章是已得天下後經理措置之大業所謂爲政者言得天下而爲之也得天下而爲之而先以尊尊親親重賢敦故之道行之於廟堂之上君臣一德以旬宣而綏理之勿使游談之士持輕重以亂天下之耳目則指臂相使而令下如流水之原矣當此之時君臣一心德而天下待命焉安所得擅權之巨室殺之不能縱之不可須以處

置遙持其生命乎裴晉公之進說也挾韓國承宗之叛服以爲辭而云非朝廷之力能制其死命此等章疏便是三代以下人習氣上失格君之道下乖純臣之義只靠著禍福聲勢脇持其君以伸己意而其文字流傳適以長藩鎮之惡而不恤以皇甫鏘之不可使居相位爲老臣者不能正君心於早以杜其萌則唯稱引古誼以明貴義賤利尊君子遠小人之大道若其不聽無亦致位以去而已今乃引叛臣之向背以怵其君使之懼而庸吾言則己志伸而國是定卽其不聽而抑有所操挾以自免於誅逐其於以道事君不可則止之義相去遠矣三代以下無大臣者此

也奈何引孟子而同之

粗疎就文字看則有道之天似以理言無道之天似以勢言實則不然既皆曰役則皆勢矣集註云理勢之當然勢之當然者又豈非理哉所以慶源雙峰從理勢上歸到理去已極分明小德役大德小賢役大賢理也理當然而然則成乎勢矣小役大弱役彊勢也勢既然而不得不然則卽此爲理矣大德大賢宜爲小德小賢之主理所當尊尊無歉也小德小賢宜聽大德大賢之所役理所當卑卑斯安也而因以成乎天子治方伯方伯治諸侯諸侯治卿大夫之勢勢無不順也若夫大之役夫小彊之役夫弱非其

德其賢之宜彊宜大而乘勢以處乎尊固非理也然而弱
小之德與賢既無以異於彊大藉復以其最爾之士一割
之力妄逞其志欲將以隕其宗社而灰亡俘虜其人民又
豈理哉故以無道之弱小而無彊大者以爲之競則競爭
無已戕殺相尋雖欲若無道之天下尙得以成其相役之
勢而不能則弱小固受制於彊大以戢其糜爛鼎沸之毒
而勢之順者卽理之當然者已曹操曰使天下無孤則不
知幾人稱帝幾人稱王白操言之固爲欺凌蔑上之語若
從旁瞻觀又豈不誠然耶是雖不得謂彊大之役人爲理
之當然而實不得謂弱小之役於人非理之所不可過也

故本文云小役大弱役彊天也。自小弱言之當役而役豈非理哉？是非有道之天唯理而無道之天唯勢亦明矣。雙峰以勢屬之氣其說亦可通。然既云天則更不可析氣而別言之。天者所以張主綱維是氣者也。理以治氣氣所受成斯謂之天理與氣元不可分作兩截。若以此之言氣爲就氣運之一泰一否一清一濁者而言則氣之清以泰者其可孤謂之理而非氣乎？有道無道莫非氣也。此氣運風氣之氣則莫不成乎其勢也。氣之成乎治之理者爲有道成乎亂之理者爲無道均成其理則均成乎勢矣。故曰斯二者天也使謂泰有理而非氣否但氣而無理則否無卦德矣。是

雙峰之分有道爲理無道爲氣其失明矣若使氣之成乎
亂者而遂無理則應當無道之天下直無一定之役人自
爲政一彼一此不至相啖食垂盡而不止矣其必如此以
役也卽理也如瘡之有信豈非有必然之理哉無理之氣
天地之間卽或有之要俄頃而起俄頃而滅此大亂之極如劉淵石勒敬帝百年而不返則天地其不立矣理與氣不相離而勢
因理成不但因氣氣到紛亂時如飄風飄雨起滅聚散迴
旋來去無有定方又安所得勢哉凡言勢者皆順而不逆
之謂也從高趨卑從大包小不容違阻之謂也夫然又安
往而非理乎知理勢不可以兩截溝分則雙峰之言氣亦

徒添蛇足而已

言理勢者猶言理之勢也猶凡言理氣者謂理之氣也理本非一成可執之物不可得而見氣之條緒節文乃理之可見者也故其始之有理卽於氣上見理迨已得理則自然成勢又只在勢之必然處見理雙峰錯處在看理作一物事有轍迹與道字同解道雖廣大然尙可見尙可守未嘗無一成之例故云天下有道不可云天下有理則天下無道之非無理明矣道者一定之理也於理上加一定二字方是道乃須云一定之理則是理有一定者而不盡於一定氣不定則理亦無定也理是隨在分派位置得底道

則不然現成之路唯人率循而已故弱小者可反無道之理爲有道之理而當其未足有爲則逆之而亡也孟子於此看得勢字精微理字廣大合而名之曰天進可以興王而退可以保國總將理勢作一合說曲爲分析失其旨矣安其危利其菑樂其所以亡自是三項人國削兵飭猶自偷一日之安者安其危也能爲國家之菑害者而彼反以爲利如虞公之璧馬平原君之上黨禍所自伏而偏受其餌者利其菑也荒淫暴虐爲酒池肉林瓊林大盈者樂其所以亡也不仁者之有此三者亦各有所因昏惰而不能自強於政治故安其危貪利樂禍小有才而恃害無已故

利其菑嗜欲蔽錮沈湎而不知反故樂其所以亡三者有
一卽不可與言矣如宋理宗亦無甚利菑樂亡之事而但
居危若安直是鼓舞警戒他不動梁武帝未嘗安危樂亡
乃幸侯景之反覆以希非望之利故雖自憂其且敗而納
景首禍之心終不自戢則人言又何從而入若唐元宗之
晚節未嘗安危而利菑也特以沈湎酒色而卒致喪敗則
雖知張九齡之忠而終幸李林甫之能寬假以徵聲逐色
之歲月故言之而必不聽三者有一則必至於亡國敗家
而若楚懷王秦二世隋煬帝宋徽宗則兼之者以其昏惰
危貪收利沈湎嗜欲樂者而言之則統爲不仁然不仁者

未必皆合有此三者也雙峰歸重末句自朱分曉其意以爲唯荒淫暴虐者則與集註心不存之說相爲脗合乃集註心不存則無以辨於存亡之著一語亦擡起此不仁者太高若論到存心上則中材之主能保其國家者若問他仁義之心在腔子裡與否則無論三月不違卽日月一至乃至一念之分明不昧亦不可得然而以免敗亡而有餘者則未能仁而猶不至於不仁尙可與言也人而謂之不仁豈但不能存其心哉直己喪其心矣心不存者謂仁義之心不存也喪其心者並知覺運動之心而亦喪也昏惰貪岐沈溺之人他耳目口鼻精神血氣只堆垛向那一邊

去如醉相似故君子終不可與言弗能爲益而祇以自辱
若僅不能存其心則太甲成王之蚤歲固然正伊尹周公
陳善責難之幾也何遽云不可與言耶

反身而誠與大學誠意誠字實有不同處不與分別則了
不知思誠之實際誠其意只在意上說此外有正心有修
身修身治外而誠意治內正心治靜而誠意治動在意發
處說誠只是思誠一節工夫若反身而誠則通動靜合外
內之全德也靜而戒懼於不睹不聞使此理之森森然在
吾心者誠也動而慎於隱微使此理隨發處一直充滿無
欠缺於意之初終者誠也外而以好以惡以言以行乃至

加於家國天下使此理洋溢周徧無不足用於身者誠也
三者一之弗至則反身而不誠也唯其然故知此之言誠
者無對之詞也必求其反則中庸之所云不誠無物者止
矣而終不可以欺與僞與之相對也朱子曰不會虧欠了
他底又曰說仁時恐猶有不仁處說義時恐猶有不義處
便須著思有以實之但依此數語根究體驗自不爲俗解
所惑矣大學分心分意於動靜而各爲一條目故於誠其
意者說箇毋自欺以心之欲正者居靜而爲主意之感物
而有差別者居動而爲賓故立心爲主而以心之正者治
意使意從心而毋以乍起之非幾凌奪其心故曰毋自欺

外不欺內實不欺主之謂也今此通天人而言誠可云思
誠者人不欺天而誠者天之道又將謂天下誰欺耶故雖
有誠不誠之分而無欺僞之防誠不誠之分者一實有之
一實無之一實全之一實欠之了然此有無全欠之在天
下固不容有欺而當戒矣誠者天之道也天固然其無僞
矣然以實思之天其可以無僞言乎本無所謂僞則不得
言不僞此如天有日其可言此曰非僞日乎乃不得言不僞而可言其道曰
誠本無所謂僞則亦無有不僞本無僞日故此曰更非不僞乃無有不
僞而必有其誠則誠者非但無僞之謂則固不可云無僞
者天之道也其可云思無僞者人之道乎說到一箇誠字

是極頂字更無一字可以代釋更無一語可以反形盡天下之善而皆有之謂也通吾身心意知而無不一於善之謂也若但無偽正未可以言誠但可名曰有恆故思誠者擇善固執之功以學問思辨篤行也已百己千而弗措要以肖天之行盡人之才流動充滿於萬殊達於變化而不息非但存真去偽戒欺求慊之足以當之也盡天地只是箇誠盡聖賢學問只是箇思誠卽是皇建其有極卽是二殊五實合撰而爲一

孟子言皆備卽是天道言擴充卽是人道在聖學固不屑與鄉原之似忠信似廉潔者爲對在王道亦不屑與五伯

之假仁假義者爲對學者先須識得此字然後見處真立處大可有至百步之力而亦不昧於中百步之巧若將此誠字降一格使與欺字僞字作對則言必信行必果硜硜然之小人便是配天之至誠矣格致誠正修齊治平八大段事只當得此思誠一思字曰命曰性曰道曰教無不受統於此一誠字於此不察其引人入迷津者不小廣平引大學欲誠先致釋明善誠身之序自是不謬以致知誠意是思誠者知行分界大段處也若慶源外認誠意爲誠身而孤責之隱微之無欺則執一礫石而謂太山之盡於是亦烏知其匪際哉

文王當商命未改之時猶然受商之鈇鉞以專征故無圖天下之心而後爲大公無私若孟子所以期當時之侯王者則異是周德已訖而民之憔悴甚矣天命須是教有所歸斯民須是令之有主此亦有廣土眾民者義之所不得辭則但行文王之政不必心文王之心而已無媿於文王況乎漢高之王漢中秦已亡而天下裂義帝之在郴南初未嘗正一日君臣如夏商世德相承之天子爲漢之所必戴也至項羽之稔惡已盈固不足以爲盟主分漢王於漢中非所宜順受之命使漢君臣不以天下爲圖徒保守一隅養民致賢而一無所爲爲之則一吳芮尉佗而已矣集

註以私罪漢未合於時措之宜也到廓然大公處卻在己在人更不須立町畦自貽胸中渣滓上審天命下察人心天理所宜無嫌可避使文王而當七雄秦項之際上無可服事之故主下無可推讓之鄰國又豈得不以天命不可曠民望不可違爲大公至正之道哉七雄之不仁項羽之不義旣惡劇於崇密而必不可北面事之苟有其德允當其位而當此兩不相下之勢如項羽之不併天下不休者又豈如四海乂安僅保一方之三苗可舞干而格則以天下爲己任者勿貳爾心而夙夜以期乎必濟正以其身爲天下用而不徇小名小義以自私藉令漢高而忘天下也

膜視此中國糜爛瓜分於項氏之手又豈文王之所忍爲乎乃若漢高之德魏文王者則其所致之賢非伯夷太公顛天宜生之屬兩生四皓終不見庸而濫以天爵施及庸伍其養民之政因陋就簡使五帝三王強教悅安之大德斬焉不傳於後世斯以爲周漢醇疵之差別爾若其圖天下於秦項之手而往必求濟也則與堯舜湯文何異道之有哉

以手援嫂自是驚天動地事集註云非若嫂溺可手援忒把手援看作等閒坐爲孟子子欲手援一語賺惑孟子自緣陷于髡滑稽無賴到底不屑與他正經說只折合得他

便休其與告子任人輩語皆然子欲手援天下乎非法語也此處唯南軒及朱氏公選看得精析不亂嫂溺自是用常禮不得處與湯武征誅伊周放戮大舜不告一例若當時天下之溺只是正道上差錯了要與他整頓卻易只消得守道之常爲之匡正則事半而功已倍矣何用似以手援嫂做出者樣非常事來故孟子之道合則行不合則止猶男女無別時只依著授受不親之常禮便足整頓自生民以來一治一亂聖賢看來全無詫異而繇亂向治之時爲之撥亂反正大經大法如運之掌固不消手忙脚亂也其云子欲手援天下乎謂援處與溺處各有登對無事張

皇如嫂命濱危須破禮合權耳

雙峰說曾皙不私其口腹之奉常有及物之心這便是好底意思曾子便能承順他此言害道不小子之事親若在飲食居處之際較量著孰得孰失得則順之失則逆之卽此便是不孝之尤陳了翁云臣弑君子弑父者常始於見其有不是處耳見其有是卽見其有不是矣以餘食及人當甚好處曾子曾元皆處貧約卽撙節而俾無失肉以得盡養亦未便是不好曾元胸中正執此道理與父母計較耳且餘食之所及者果飢寒待此以爲命者乎或在童稚或在僕妾亦只是响响之愛有如父索所餘之財貨以授

非所當得之愛妾則固溺愛不明而陷於惡矣乃天下不孝之子纔於此辨是非便做出逆天大惡來也不顧恤故舜之琴張干戈自非象之所宜得然使父母欲以與象豈便固執不與天下無不是底父母則亦無是底父母也凡此之類父母卽極其不是也只欣然承順雙峰云要諭之使合於道一諭便是責善責善便是爭爭便是忤逆父子之間各執一是以相訟而人道滅矣若禮所云有過則諫者自是關係行檢大綱目處豈在饔飧杯酒斗粟尺布之間苟求其得失貴戚之卿且必君有大過而後諫況子之事親耶且過之大小亦因乎人之生平若文王孔子以爲

父則一舉動之可疑不妨以異同請益若在瞽瞍則不格姦而已足至於言行好惡之紕繆一一而辨其得失將終日疾首蹙額於問安視膳之時卽欲求一刻之承歡而不得矣故唯親之可諭於道而不怙其惡者乃可施其幾諫要亦須於己所修之子職了無干涉然後可見之言詞此非以避嫌也纔到干涉處恆人之情便易動怒相激而爲賊恩之事所必至矣故曰直情徑行夷狄之道也新安云一飲一食之間尙承親志如此況其立身行己之閒乎只此極得曾子之心

舜之於瞽瞍便盡索其所有以與象亦須訢然承順至於

舜之華孳爲善莫之能禦雖非瞽瞍之所欲則又不敢量其親之必無此志而不以完德爲承志也在親自有志事之分在我又有失身不失身之別親既不但有其志而見之言語動靜如問有類於我則雖不盡當於道而終不至於失身如以餘食與者處正好行其天下無不是底父母之心故舜之牛羊倉廩琴張干戈便瞽瞍將授之盜賊也不得留纖芥於胸中其不可者唯欲使象代舜爲天子耳以天子之位天授之堯禪之非舜之有也人子之於親能有幾椿事物與舜之有天下一例乃忍區區較其爲公爲私爲得爲失哉甚矣雙峰之俗而悖也

唯瞽瞍欲以舜之天下與象則不可承順若泰伯伯夷則亦必訢然承順舜受堯之天下本非所有而以道受之徇私親而以與象便是失道失道則失身矣泰伯伯夷以世及之國幸親不以與異姓而欲授其弟則承志而逃之方是求仁方是至德方是不失其身叔齊之賢不能過伯夷而以偏愛故亂長幼之序雙峰所云不好底意思孰甚於此浸令伯夷見親之過而欲以諭孤竹君使勿素長幼之禮豈非衛輒之流亞乎且到者處所豈但伯夷卽凶悍貪鄙之子也難出口去諭欲諭而不能而又懷必諭之心懷忿浸淫而商臣之惡起矣故曰雙峰之說害道不小

人之易其言與好爲人師兩人字雲峰以爲與大學修齊章人字不異亦自分曉但爲易其言者說則所謂徵色發聲而後喻者自不可與上智同年而語然苟有責而不易其言猶在困學之科雲峰云爲泛然之眾人而言則又太屈抑之矣泛然之眾人一面受詬罵一面譎言無忌也若惠施之遇匡章理愈窮則詞愈嫚又何嘗肯自媿怍而息說況悠悠之人並不逮惠施者乎至於好爲人師者則泛然之眾人固不特無其事而抑並無其志且雖好之而人終不師之則亦何患之有雲峰緣書言教學半禮言教然後知困孔子以朋來爲樂孟子樂得英才而教育疑

聖賢之不以爲患故有泛然眾人之說乃不知決一疑
又入一疑也解聖賢文字須如剝笋相似去一層又有一
層在不可便休須到純淨無殼處笋肉方見孟子此言元
對當時處士而言聖賢既不以爲患眾人又無好爲師之
事唯若惠施公孫龍一流人他无理會自家只要開立法
門終日揣摩卜度宛轉曲折以成其說千枝萬葉總欲璀
璨動人苟伸其一偏之旨而以爲人所宗主只此他劈頭
便從虛誑上著力故其學之也亦非不博思之也亦非不
深執之也亦因而推之也亦遠乃其意中唯有此爲師之
好將孔了也看做恁樣做出來底則迎頭便差墮入非辟

故曰人之患在此以其蔽陷離窮載胥及溺而莫能淑也
凡此一類皆有過人之資而又不無好學深思之事乃以
徇名求利自尊好勝之心可惜此一項有用人才墮入禽
狄去故曰患患者自外來者也非其所應有之憂而以一
好累之則既可深惡而抑可深悼如人之有病患非形體
所固有乃以不正之氣所感流傳腑藏遂以傷生者然孟
子當時饒有此人只貪一箇北面臯比後車數十乘從者
數百人便惹下人心世道一大害來故直指他受病根本
爲此輩清夜鐘聲言汝之所以舍正路放本心而放恣橫
議者只在此處趁門風圖利賴而已若能去此一好則以

汝之才亦何至充塞仁義而率獸食人乎此所謂可深悼者也乃儘他說得天花亂墜公然與堯舜周孔爲對壘也只是收合一起閒漢做成一部文章的本願勘破他此處卻元來自家也不曾果有邪僻在但爲些須名利造下者場虛謊此則所可深惡者也後來王仲淹全是此病而韓退之亦所不免通也愈也亦豈汎然之眾人哉近世龍溪以下諸儒傍釋氏之門庭以入流合俗而建宗風蓋亦不讀孟子此語耳

實與本確然不同本者枝葉之所自生實者華之所成也集註謂有子以孝弟爲爲仁之本其意亦猶此是大綱說

道理恐然說二者是實則嫌於以仁民愛物貴貴尊賢等
爲虛花故通諸有子之說以證其有可推廣相生之義實
則有子之意以孝弟爲爲仁之本教學者從此立定根基
發生去孟子則言凡盡五常之德者皆當以此爲實也若
一向在外面去做卻於二者有缺則是心已不著在腔子
裏與自家根本真心相體認儘著外面推排都是虛殼子
撐架著尋常說仁義禮知樂及至反躬自驗而其或爲切
近或爲迂遠或爲精實或爲虛疏一倍了然自喻知唯此
之爲實矣諸說唯西山說見大意劈頭仁義二條卽是教
爲仁義者一依據緊要事故五實字一般元無差異雲峰

橫生異同將前二實字作人本心說便不得立言之旨若論原頭發生處但有遠近親疏之別初無先後之序人性之中仁義之全體大用一切皆備非二者先而其餘皆後一落後則便是習不是性矣唯斯二者痛癢關心良心最爲難昧故曰實當身受用處較其餘自別如穀有實乃是人喫得飽滿物事也雙峰及張彭老之說皆不合本旨蔡氏將知而弗去作兩件說真成詫異向後引證愈見支離說是非爲二又與此知明守固不相干涉俟而此爲二俟而彼爲二就蔡氏言之已爲四矣況從是而往盡智之用有千萬而無算者乎禮有三統樂有五音又豈禮有三

質樂有五寶邪其曰如五行水土俱旺於子乃不知土生於申是術家附會安排大不恰好處使土果生申而旺子則月令位土於長夏之中宮當午未之餘尙在未得長生之地而辰亦土位恰當墓庫又何說也卽以術家之言推之亦當謂土生於辰巳之交可耳水土相剋故不得同宮俱王也且此亦何足爲四德五常徵生王之說以化氣言四德五常以體性言如水生申旺子絕已豈人心之智亦申生子旺而已遂絕耶又云五臟心肝脾肺皆一而腎獨二其說尤鄙腎有二肝與肺且不啻二矣且以六腑言之太陽寒水爲膀胱膀胱亦有二耶內形旣然外形亦爾如

口一而耳目鼻皆二其於五常四德又何象哉形而上之道與形而下之器雖終始一理卻不是一箇死印板刷定底蓋可以形而上之理位形而下之數必不可以形而下之數執形而上之理若撇下本領只向畫影圖形握算子分部位上討消息雖其言巧妙可觀而致遠必泥君子不爲也孟子說知斯二者弗去只是一套話說教詳盡何嘗分爲兩扇如腎二枚相似慶源云知既明則自然弗去較之蔡說自免於邪然孟子一知字只淺淺說故加箇弗去未嘗如慶源於知字下加一明字說得盡也以實求之事親從兄初無深隱莫察之蘊亦人所易知而特難於弗去

其所以難於弗去者以斯二者與其他事理不同凡理之
有所得而復去者類爲私智邪說之所亂故知之明則不
復去乃斯二者雖經不孝不弟之人亦無私智邪說煽亂
他別作一番假名理只是其知之也不能常常不昧一會
惺忪一會懵懂遇昏著時便忘了也去字當如字讀與不
違仁違字一義俗作上聲讀者不過常知不昧便是弗去恰緊在弗
去上見智非恃其知之明而卽以弗去也故慶源之說賢
於蔡氏而要於此未當

事親方是仁之實從兄方是義之實知斯二者方是智之
實節文斯方是禮之實樂斯方是樂之實若不於斯二者

盡得則雖愛以爲仁敬以爲義明察以爲智習儀以爲禮
嫻於音律舞蹈以爲樂卻都是無實無實便於己不切卽
非心德孟子立言之旨大概如此所以到樂上又須引伸
一段緣樂之爲教先王以和人神學者以治性情似所用
以廣吾孝弟者而非孝弟之卽能乎樂故孟子又推出學
樂者一段真情與理來自非心有日生之樂志和氣順以
手舞足蹈自然無不可中之節奏則竟不可以言樂故學
者之學於樂必足之蹈夫舞綴之位手之舞夫干羽之容
得之心應之手足不知其然而無不然斯以爲樂之成然
使其心之樂不日生不已則非其鬱滯卽其放佚音節雖

習而不可謂樂也唯能以事親從兄爲樂而不復有苦難勉強之意則心和而廣氣和而順卽未嘗爲樂而可以爲樂之道洋溢有餘乃以之爲樂則不知足蹈手舞之咸中於律者斯以情益和樂而歌咏俯仰乃覺性情之充足非徒侈志意以取悅於外物也此樂孝弟者所以爲樂之實也樂斯二者一樂字有力是事親從兄極頂位次孔子所謂色難者正難乎其樂也故朱子曰要到樂處實是難得不是現成樂底須有功夫在其始亦須著意但在視無形聽無聲上做去調治得者身心細密和順則自然之樂便生自然之樂是生字上效驗勿誤以解樂字始樂時一須

加意去樂此聖賢一步喫緊工夫不可刪抹足蹈手舞自
當如慶源說是作樂之事不然此二語更無歸宿聖賢恰
緊文字斷不作有說無義鏡花水月語也若莆田黃氏向
此段無是也二字作商量一片閒言游語讀之令人欲噦
說事親從兄便有知之弗去節文而樂在裏面抑能知之
弗去節文得當而樂之方叫得事親從兄雙峰以智禮樂
爲道生大是差謬作文字時須如此宛轉分配實則言人
能常知事親從兄外盡其節文而內極其和樂則仁義禮
智樂之實皆在是也集註然必知之明云云是朱子補出
言外之意非孟子大旨其歆重知亦微有病蓋愛之推及

民物敬之施於貧與賢者求以盡仁義之大用則存乎知行之並進而事親從兄在孩提稍長而已知其喫緊工夫唯力行而已天下之不能事親從兄者豈不知親之當事兄之當從哉故於智必言弗去常提醒此心明了不忘是之謂智非未行之前日取事親從兄之理學之問之思之辨之以致其知也論語集註知猶記憶也恰與此處昭合知處有工夫而無條目只分明記憶得便是若夫事親從兄所應修之職辨之須明而處之須當者在此章則又屬禮之節文而非智之事故曰知字說淺不須加一明字兼乎華則並尙知純乎質則專尙行集註於此不無滲漏

不可以爲人語意極嚴不可以爲子較寬一步說不順乎親是子違之未盡而不可以爲吾父之子也不得乎親則人而禽矣朱子人是大綱說一段文字差錯此處輕重失審則將有輕天性之愛而專意於責善者舜怡緊在得親上故曰盡事親之道延平先生無不是底父母一語正於此立萬世之權衡

各止其所而無不安集註此語說得廣大如申生固能爲人之所不能爲卻令天下之父子許多疑難處依舊不得箇安靜在中材以下要死旣難賢智者又慮死之猶未爲盡道從此便開出歧路以至不忍言之事而亦犯之舜卻

平平常常移易得恰好依舊父愛其子子承其父天下方知無難處之父子何用奇特張皇不安其所而強有事也孟子此語籠罩千萬世智愚賢不肖父子在內故集註以廣大深微語配之讀者勿忽

離婁下篇

舜之於父文王之於君俱非行乎中國事而尤不可謂之得志孟子所言乃大行之常道南軒所云乃憂患之微權相去正猶逕庭若論聖人處權變則道固不同舜傳賢而禹傳子文服事而武伐商一堂之父子君臣早已異矣況千歲而可執一耶新安此心此理之說白象山來象山於

此見得疎淺故其論入於佛其云東海西海云云但在光影上取閒架捉線索只是三界唯心一籠統道理如算家之粗率乃孟子之言一揆也於東夷西夷千歲前後若論心理則何有於時地以時地言者其必以事跡之因時而制地者審矣聖賢之立言也正在天理爛漫形著明動上徵道之誠然終不向燭影螢光尋個相似處測其離合而孟子一書十九爲當時藥石顯真理以破妄說此一章書自緣戰國游談之士非先王之道者謂時異地殊法必改作不可以虞周之治治今日不可以蒲坂岐陽之治治他國故孟子顯示兩聖人所以行乎中國者時地相去之遠

如此而所以揆度天下之務者無異

揆字自當如慶源解

其揆一也文義自

見則齊趙秦趙何不可移易之風俗而非田學挾何徒可

行於古而不可行於今彼壞法亂紀苟簡趨時以就功名

如趙武靈商鞅李悝者徒爲亂而已矣朱子於學庸章句

論語集註屢易稿本唯孟子註未經改定故其閒多疎略

未盡立言之旨如此類者不一而門人後學以師說未定

輒借陸氏之誠詞附會成義以叛入異端後學之責當相

與修明豈得雷同以遵註爲了境邪

行辟人亦是平政之事尊卑等秩各安其所正所謂政也

君子之平其政至於行辟人而可則雖不近人情而自尊

卑人亦以爲平也此二語是救正子產不知大體處焉有大夫之車而庶人可乘之以渡水者乎此二句是一意焉得人人而濟之連下三句是一意孟子文章簡妙處不須立柱子分對仗只一氣說下自有片段蘇氏唯不知此故以閒架文字學孟子文且不相似而況其道乎集註亦於此看不出浸云君子能平其政矣則雖行辟人焉而亦可然則政之未平者便當罰教與百姓肩摩衽接一場胡闕耶看文字須向周漢以上尋章法不可据八大家割裂排仗勾鎖分支此其得失雖小而始於害文者終於害意始於害意者終於害道亦非細故也四書分節處不可執作

眼目類如此

朱子說子產有不忍人之心而不能行不忍人之政貼得孟子本意分明唯其有不忍人之心所以可謂之惠慶源譏其有內交要譽之心此酷吏生人人罪語儒者立法嚴而宅心恕不宜爾也惟其有不忍人之心故孟子以不知爲政箴之令其有內交要譽之心則此種徹底詐僞人不知爲政姦亦不深使其爛於政理以濟其姦則惡益滔天而無忌矣子產自是赤心救國一箇社稷臣終不似陳氏之厚施王莽之謙恭唯以內交要譽爲心王莽以有此心故一部周禮依樣畫出適以流毒天下故曰知爲政以濟

其姦而惡益滔天也孟子說五伯假之也亦只在事上假若論他立心處雖有不端卻一直做去若觸處便起私心雖在拯溺救焚時也只在內交要譽上商量則天下又豈可盡欺只一兩端便雪融尸現直成一事不得又何以爲五伯何以爲子產而孔孟且以惠許之邪

孝經云資於事父以事君而敬同資於事父以事母而愛同則君之與父不得合敬而又同愛矣天下無不是底父母延平此語全從天性之愛上發出卻與敬處不相干涉若論敬則陳善閉邪之謂也苟不見邪更何所閉潛室套著說天下無不是底君則於理一分殊之旨全不分明其

流弊則爲庸臣逢君者之嚆矢其根原差錯則與墨氏二本同矣君之有不是處諫之不聽且無言易位卽以去言之亦自須臾白分明故湯武伊霍之事旣與子之事父天地懸隔卽在道合則從不合則去美則將順惡則匡救君之是不是絲毫也不可帶過如何說道無不是底去做得若人子見道無不是底父母則諫而不從終無去道也如云此自君之加我者而言之而非自其用人行政之失言也乃去就之際道固不可枉而身亦不可失故曰士可殺而不可辱假令君使我居俳優之位執猥賤之役亦將云天下無不是底君便欣然順受邪韓退之唯不知道故其

擬文王操有云臣罪當誅兮天王聖明顯出他沒本領假鋪排勾當又何曾夢見文王心事來朱子從而稱之亦未免爲其佞舌所欺夫使文王而以紂爲聖明也果其心見以爲然邪抑心固知其不然而姑爲此愛之之語邪果其心見以爲然則是非之心已爲恭敬所掩所謂之其所畏敬而辟愛而不知其惡矣如知其不然而姑爲此語則與王莽之泣禱於天願代平帝之死者又何以別聖人人倫之至不是僞舌賣弄底君之當敬豈必聖明而後敬哉故曰不以舜之所以事堯事君不敬其君者也而豈得以舜之所以事瞽瞍者事君乎如云臣罪當誅則文王自見當

誅必將以崇侯爲無罪矣而又胡爲乎伐崇也聖人一誠而已矣爲臣而盡敬於君誠也君之不善不敢以爲聖明己之無罪不敢自以爲罪亦莫非誠也臣罪當誅天王聖明則欺天欺人欺君欺己以塗飾罔昧冥行於人倫之際而可以爲誠乎孟子國人寇讐之言不爲無過卽以孟子去齊宿晝之事證其不然足矣韓退之以私意窺聖人慶源以淺見學延平非予所知

卽於唐宋人詩辭求之自有合理體語如云執政方持法明君無此心云不須愁日暮天際乍輕陰旣不失忠愛之旨而緇素自在較諸臣罪當誅天王聖明之語豈不有誠

僞之分也說到自家忠孝分上一勦襲卽入大妄退之是從凱風母氏聖善我無令人勦來正與慶源之襲延平同病胸中無真血性只依他人見處一線之差便成萬里如退之說博愛之謂仁亦是如此繇他胸中未嘗有仁只攬取近似處湊手作文字其實他人品心術卻在顏延之庾信杜甫韋應物之下細取其詩文讀之敗露盡見也

孟子所謂大人皆自道也是充實之謂美進一步地位不屑屑與小人對橫渠精義入神觀其會通等語極切義理充實方有可會通之勢不得充實便有缺陷處則靠支貸處去補補處早是窒礙如何會通得旣已充實而又致其

精義入神之功則光輝生於篤實之中便禮義皆從天真
流出何至有非禮之禮非義之義禮義從中流出充滿篤
實大要得之養氣其會通而入神以有其光輝者大要得
之知言至此便渾身在天理上恣其擇執此幾與孔子不
惑耳順同一境界但須著弗爲字有力則未至於從欲不
踰化不可知之境耳以此知孟子之所云大人者皆自道
其所至而非但對小人而言也非禮之禮非義之義爲之
者未使大差豈至於與似是而非者同科其云似是而非
者雲峰之妄也似是而非則固非矣今云非禮之禮非義
之義猶然爲禮義也似是而非乃鄉原之以亂德者如原

思辭粟自是非義之義豈遂如紫之奪朱莠之亂苗哉只緣大人以降義禮有不足處如貧家請客烹飪未能合宜不獲已且與遷就若集義而無所餽學不厭教不倦而言入心通則如官山府海隨所取舍不至有何有何亡黽勉求之之事矣曾何小人之足云

言養則自與教不同非君子之須有異術乃受教受養者之品地別也教是箇大鑪冶與其潔而不保其往者無不可施故不可行之於子弟養須是有可養之具倘如蕪穉縱然養就亦不成稽集註謂無過不及之謂中足以有爲之謂才卽此二語自有分曉或過或不及而未足有爲者

自不至如夫子教我以正夫子未出於正之頑訟也唯在所養之人爲有可養之材故或不須董之以威而待其自熟乃欲養之則必盡其壅培修剔之力而非有所故爲寬假此於君子不教子常法之外通一格言子弟之可養者不當執不教之律坐視其可以有成而棄之養與棄相對說只重在不棄不須於養字上作從容溫藉解書稱敬敷五教在寬與此全別彼言教愚蒙不可使知之民此言可養之子弟彼言敷五教大綱不干名犯義是粗底事此言養之使中且才進德修業是精底事新安引据全差朱子說著箇便是不同處極須向不同處分曉若認大人

赤子了無不同則已早侵入異端界也凡看古人文字有顛倒讀皆順理者有只如此順直說倒不得者如大人者正己而物正者也則倒說正己而物正者大人也亦可若此章則倒說不失其赤子之心者大人也不可不失其赤子之心未便卽是大人特謂大人者雖其篤實光輝而要

不失其赤子之心也在有諸己之謂信者已能不失其赤子之心矣此數章書自相連說下反覆見意大人者言雖不必信行雖不必果而赤子之心則必不失無不誠之明無無本之道也赤子之心是在人之天集註云無僞與易无妄一義繇人見其無僞非不爲僞之謂赤子豈刻意而

不爲僞者哉大抵人欲便妄天理便真赤子真有未全而
妄不相涉大人之不失所謂無欲而後可以行王道者是
已雙峰卻從飢便啼喜便笑上著解乃不知飢之啼喜之
笑是赤子血氣分上事元非赤子之心煞認此爲真心是
所謂直情徑行戎狄之道耳釋氏以行住坐臥運水搬柴
爲神通妙用者正在此處墮人禽狄去孟子說箇赤子之
心是從天道上見得不容向一啼一笑討消息孟子道性
善則固以善爲赤子之心可知心統性情赤子便有性而
未有情只性之善者便是若知啼知笑則已移入情矣雙
峰之說正告子食色性也之邪說

既曰赤子之心卽性善之善則盡性者唯聖人乃又云有諸己之謂信已能不失赤子之心未便是大人豈不自相矛盾此又不然雖曰性善性卻不能盡善之致善亦不能盡性之藏可欲之謂善早已與性相應矣不失未便到盡處可欲之善有諸己之信豈可謂之失其性乎孟子亦止道性善卻不得以篤實光輝化不可知全攝入初生之性中中庸說昭昭之天無窮之天雖無閒別然亦須分作兩層說此處漫無節奏則釋氏須彌入芥子現成佛性之邪見皆繇此而生愚每云性日生命日受正於此處分別在天之天不貳在人天之天不測也

小註中朱子及輔陳二氏之說全以自然釋自得與南軒別乃集註旣云自然又云得之於己則兼采南軒之說以盡其義亦不可定謂南軒之弊有如莊子也本文云深造之以道欲其自得之語相呼應深造之功正與自然之得相應深造不以道以道而造之不深則其時有所得是孥著一定要得卻刻期取效乍可有得而據之此正與自然而得者相反如諺云瓜熟蒂落則深造而得之不勞矣然所謂自然而得者亦卽於己得之之意彼孥著守著強勉求得者唯其刻期取效於見聞而非得於心深造之以道則以道養其心而心受養於道故其自然而得者唯吾心

之所自生也既深造以道便已資於學問義理之養則與莊子守此無物之已墮耳目棄聖智以孤求於心者不同莊子撇下物理求自孟子藉學問思辨之力以養其自大分別處只在此到頭來莊子自得其已而不問道之合離孟子得道於已而充其萬物皆備之體也豈至一言自而卽相混哉南軒唯他人二字下得不好沒著落在必求其歸則疑與莊子同看來他意旨原不爾只帶出一他人作反照未免苟簡無實耳所以朱子旣用程子自然而得之解仍須加於已二字使學者無疑得諸已者之非而靠定聞見斷棄此心從小體而失其大此自字唯不須立一人

字作對卻與反身而誠言反身者相近亦與論語註不言而識之於心一心字相連亦是學者喫緊論功取效處不可刪抹卽以自然而得言之所謂自然者有所自而然之謂也如人剪綵作花卽非自然唯綵雖可花而非其自體所固有必待他翦若桃李之花自然而發則以桃李自體固有其花因其所自而無不然無待於他繇此言之則吾心爲義理所養親得親生得之己而無倚唯其有自而然斯以自然而然明矣天下之義理皆吾心之固有涵泳深長則吾心之義理油然而生得之自然者皆心也其不自然者則唯其非吾心之得也此是學問中功夫語與老莊

舍物求自以爲道者本自不同若因迹近莊子而遂以爲不然則夫自然者老莊亦嘗言之矣又何以可言自然而無害邪

佛氏不立文字莊子棄糟粕之說他差錯處非能背馳只是躡等天下那有兩箇道理許佛老與我並立而背馳只是他顛倒用來便於事理種種差錯如稻麥之有苗葉所以爲粟之房幹而粟必繇是以生非可輒於苗葉作可食不可食之想因棄苗而求粟聖賢之學則須說深造之以道欲其自得佛老欲自得卽向自得上做去全不理會何以得何以自得顛倒說深造之以道便非自得聖賢則須

說博學而詳說之以反說約佛老欲說約則一句便從約說起而於約之所以爲約者只據一星兩星便籠罩遷就去顛倒說博學詳說便不得約此是喫穀種見解見人雨穀於田顛倒笑人可惜此可食之穀卻教墮泥土中變作草也思及此異端之愚真可笑可憫儒者不察乃謂彼有徑直門庭我須與他分別則是見彼喫穀種子之愚便不粒食又奚可哉聖賢之道則是一以貫之異端則是以一貫之他一字小聖賢一字大他以一爲工夫屈抑物理不憚他不貫聖賢以一爲自得之驗到貫時自無不通他自字孤另聖賢自字充實他約字巧妙聖賢約字包括他極

頂處說佛法無多子只是趁此一線縈著去便謂之約謂之白謂之一聖賢卻看得無事無物非在己所當知明而處當者此一箇萬物皆備之身須約束著萬事萬理無使或踰故不深造之以道必不能自得不博學而詳說必無以說約天下只有約說不盡行不徹也堯舜之禪受湯武之征誅周公之用而行孔子之舍而藏六十四卦之錯綜二百四十二年之天道王事皆約中所貫徹之實如何可以少見多怪而能說之集註誇多鬪靡云云是專就俗儒記誦詞章之學反說若孟子之意則俗儒異端之妄俱於此闕之故徒博無益徑約則謬兩說若廢其一不足以盡

本文將以二字之旨此言將以前章言欲其其義正同言所以如彼者乃以如此而俗儒之徒博異端之徑約其皆舛錯可知已朱子答或問一段極切當蓋世閒所稱博學者只在風雲月露花鳥禽魚上用功合下便不可謂之學而所當學者全然不省更有於博見之不真言之無實又如何喚得詳既云博學而詳說則顯與俗儒不同年語矣喫緊破妄處只緣不知約者妄意一言片語穿插伶俐做成一場大虛妄來故孟子特地與說必博學而詳說乃可說約故君子將以反說夫約必博且詳焉則汝以我之博且詳爲與俗儒之鬪靡誇多者同病而乖異乎約者真

全不知學以自誣而誣人也聖賢分別處只是深造以道只是博學詳說於此做得清楚有緒更不消向自得及說約處立門庭矣

西山云人物均有一心人能存物不能存此語鹵莽害道不小自古聖賢喫緊在此處分別孟子明白決斷說一箇異字西山卻將一均字換了犬之性猶牛之性牛之性猶人之性告子猶能知其不然而西山卻滅裂此心教同牛犬蛇蝎去悲哉心便是統性情底人之性善全在此心凝之只庶民便去禽獸卻不會去禽獸只一向蒙蒙昧昧其或有精明處則甘食悅色而已此心存之又將何用朱子

云今人自謂能存只是存其與禽獸同者此語如迅雷驚
蟄除朱子外無人解如此道必知其異而後可與言存若
云與禽獸均有之心但存得卽好其不致率獸食人人將
相食者幾何哉西山於此似認取箇昭昭靈靈自然覺了
能知底做心而以喚醒著不沈不掉爲存此正朱子所謂
存禽獸之心者看孔子作春秋天道備人事決定王道之
權衡而亂臣賊子自懼全是雷雨滿盈經綸草昧事何曾
與禽心獸心有毫髮相似如所謂昭昭靈靈喚醒主人者
哉

鰥魚警夜鵠鳴夜半鷄鳴將旦布穀知春鵲鳴知寒蟋蟀

吟秋明駝洲水靈巖三喚主人翁只是此物此則與禽獸
均有之心也孟朱兩夫子力爭人以異禽西山死向釋氏
脚跟討箇存去以求佛性於狗子考亭沒而聖學充塞西
山且然況其他乎

不識得異字固是西山一大罪過扣緊存字作工夫則始
於和靖之失而朱子亦未之定也西山云人能存而物不
能存若謂禽獸不能存人心則彼本無人之心而更何所
存若謂禽存禽心獸存獸心卽與君子同功愈不成說此
存字與去字對說庶民之去亦非決意用力而去之但就
其迷失無存而謂之去君子之存亦非必有物焉爲其所

據但綱紀不紊終遠禽獸而謂之存耳存之在成德上見
天理民彝人官物曲節節分明既不使此身此心墜於利
欲之中與麀之淫虎之暴狼之貪等亦必不使此心孤據
一空洞昭靈以握固而守之與鶴之警鸛鵲之慧眠牛飽
豕之漠然無求同乃以使吾人居天地之間疆界分明參
天地而盡其才天下萬世乃以推其德成之效而曰人之
道於是而存也其曰幾希者則謂其相去之際出乎此則
入乎彼其界限不遠乃所以異者既不遠則凡終身所爲
終食所念有幾希之不能異者卽以無別於禽獸故幾希
者嚴詞亦大詞也

一指西

重山而非有一物焉孤孤另另亭亭

特特爲人之獨得可執而存之爲君子之所奉持而彼庶民者取此一寶命而擲棄之也以要言之此處添一箇心字不得人之自身而心自內而外自體而用自甘食悅色

人甘芻豢牛甘藁芻毛燭西施魚見之深藏鳥見之高飛卽食色亦自迥異

以至於五達道三

達德之用那一件不異於禽獸而何但於心件件異件件所異者幾希異便是存不存異便是去若孤据一心則旣於心爭異而又於心言均其不自謂能存而但存禽獸之心者鮮矣雙峰說做箇存的樣子一語極好君子之存在德業上有樣子可見如舜禹所爲等非有下手工夫秘密法也只如明倫察物惡旨酒好善言等事便是禽獸斷

做不到處乃一不如此倫不明物不察唯旨是好善不知
好卽便無異於禽獸故曰幾希和靖說舜是存君子便是
存之把定存之作工夫則硬執幾希爲一物事而爲君子
者戰兢惕厲拏定者些子不教放下其與釋氏三喚主人
相去幾何恐其所謂些子者正朱子所謂與禽獸同者也
硬認著些子作命脈便是執一要執一卽是異端異端則
是禽獸釋氏說三界惟心萬法唯識正拏定幾希以爲所
存之物其二六時中不教放下者和靖所謂存之也其云
恰恰用心時恰恰無心用者和靖所謂存也乃不知聖賢
全不恁地用功仁義且不把作一物拏著來用故曰非行

仁義在舜固然禹文孔子亦無不然湯武周公亦無不然
且如武王不泄邇不忘遠自是道理周匝流通不竭豈拏
定遠邇作降伏其心之具而拏之也乎故君子之澤一章
但言道統不言心法聖人君子到此初無二致只件件與
立人綱修人紀更無妄勉之分和靖強與分析以犯異端
之壘朱子未與折衷亦疏矣

若論異則甘食悅色處亦全不同若論其異僅幾希則仁
義之異亦復無幾虎狼之父子亦似仁蜂蟻之君臣亦近
義也隨處須立箇界限壁立萬仞方是君子存之若庶民
便愛親敬君也只似虎狼蜂蟻來趁一點靈光做去也苟

知其所以異則甘食悅色之中非并分別處卽至仁大義之所在不可概謂甘食悅色便與禽獸同也聖賢喫緊在美中求惡惡中求美人欲中擇天理天理中辨人欲細細密密絲分縷悉與禽獸立箇徹始終盡內外底界址若概愛敬以爲人斷甘食悅色以爲禽獸潦草疏濶便自矜崖岸則從古無此苟簡徑截之君子而充其類抑必不婚不宦日中一食樹下一宿而後可矣朱子說人能推禽獸不能推亦但就才上見得末流異處而未及於性禽獸之似仁似義者當下已差了虎狼之父子只是姑息之愛蜂蟻之君臣則以威相制而利相從耳推得來又成甚倫理中

庸說誠之者人之道也方是徹底顯出誠仁誠知誠勇以行乎親義敬別信之中而徹乎食色之內經緯皆備中正不忒方是之所以異於禽獸而明倫察物惡旨酒好善言以至於作春秋明王道皆從此做去豈孤保其一念之善而求助於推廣之才哉

目言仁義之心則以存之爲工夫孔子曰操則存孟子曰存其心者心也若人之異於禽獸則自性而形自道而器極乎廣大盡乎精微莫非異者則不可以仁義二字括之故曰非行仁義明夫非守仁義二字作把柄遂可縱橫如意也特其人紀之修人極之建則亦往往依仁義以爲用

故曰繇仁義行此自舜至孔子無不以之盡君子之道者此章將湯武周公與舜孔子並敘不可更分性反湯武他處不及舜孔到此人禽關界小有蹉跌則已墮入異類而舜孔雖聖亦不能於此上更加藻績何得又推高舜於君子之上徒添蛇足和靖扼存之作工夫故橫立異同循其說而不加之裁正則必以頑守一心爲存或且執虎狼之愛蜂蟻之敬爲仁義而務守其冥合之天明則正朱子所謂存禽獸之所同者其害豈小哉

集註說性兼說形方是徹上徹下知天知人之語性之異者人道也形之異者天道也故曰形色天性也唯聖人然

後可以踐形中庸以至誠爲天道亦是此理仁義只是性
上事卻未曾到元亨利貞品物流行中揀出人禽異處君
子守先待後爲天地古今立人極須隨在體認乃可以配
天而治物行仁義者不足以當之也孔子作春秋何曾有
仁義作影本只權衡來便是仁義若論其實也不過人之
異於禽獸者耳古今此天下許多大君子或如此作來或
如彼作來或因之面加密或創起而有作豈有可傳之心
法直指單傳與一物事教奉持保護哉人自有性人自有
形於性盡之不盡禽性於形踐之不踐禽形而創制顯庸
仁義之大用立矣嗚呼此孟子之所以爲大人而功不在

禹下也

古之善射者類以羿名孟子曰羿之教人射蓋唐虞之羿以射教人者非有窮后也有窮后之死自以淫田不道非有人如天子之善射而殺之者集註以篡弑黨逆爲言要爲未審如果羿與寒浞則彼此俱爲亂賊與安史父子等皆蹈滔天之惡必誅不赦而但以取友不審較量其罪之厚薄不已迂乎集註又譏庾斯廢公全私亦未察於春秋時事春秋列國之相侵伐固不以斬將陷陣爲功如獻廩遺弓奉漿攝飲當時正以此服人則不必其師友而釋之亦未爲不可蓋彼此均爲侯國且干戈而夕玉帛殺一人

未足以爲利而徒深其怨故雖縱敵而軍刑不加其或勝或敗初不關宗社之存亡自不可以後世之武臣所與爭一旦之命者非夷狄則盜賊勝則安而敗則危者比也其必以折馘執俘虜劉濱盡爲功自戰國始有而成於秦項之際要非可論於春秋疆場之爭一彼一此者也不然則庾斯賣國全私與秦檜之班師周延儒之縱敵等其罪又豈在逢蒙之下而何以得稱爲端人

程子所云此章專爲智而發一句極難看雲峰孟浪聽得便與勉強穿合云本欲言智而先言性智五性之一也但作此見解則上而天下之言性也一句作何安頓孟子欲

言智而故爲此迂遠不相登之說作八寸三分幘頭起

古人未有此虛脾文字朱子云人之爲惡水之在山則非

自然之故

言水者即通下治水禹之治水使之下也

又云天下之理本皆利順

夫然則朱子顯以所惡於智者一段申故者以利爲本之

義見言性之當循其利而不可鑿而以禹之行所無事順

其利下之理者爲徵是以智言性而非於性言智明矣乃

又取程子之說而贊之曰得此章之旨則以天下之言性

而不循利以爲故者類皆聰敏辨慧之士特以有智而不

知所用則遂至鑿其所本不可通者而強之使通是不知

用智之過而以成乎言性之失故曰鑿以自私則害於性

而反爲不智蓋性隱於無形而已然之迹其利不利之幾亦不易察自非智足觀理則無以審之於微而傳之於顯則智本有功於言性之具而其所惡者特在鑿智耳其曰害性者非傷害其性中渟樸天真之謂乃言其說之蠹害於所性之理猶孟子之所云率天下而禍仁義也迨其說戾於性而言以移心心以害事則邪說詖行交相牾亡卽以自賊其性而有餘然要爲智以害性而成不智而非卽以害性中之智如雲峰牽合之說也說性善便是行其所無事說性無善無不善等卽是鑿以水喻性以行水喻言性顯與下言治厯同爲譬說故亦與答告子過類在山之

說通若謂智以應天下之事理者而言則禹之行水卽用智之事而何以云若云亦其爲取類相譬以喻言性者之當善用其智固本文之極易知者也集註前後元無兩義特以程子之言不易曉了故爲曲通之如此以防天下之誤解程說割裂本文者而雲峰尙爾不知學者之大病纔讀一句書便立地要從此解去以趨悖謬安得好學深思之士而與論大義哉

集註釋鑿字上加一穿字朱子沿俗語而失者也穿鑿出淮南子上音串下音才到切穿筍也鑿孔也穿鑿者謂以方穿入圓鑿不相受也於此處不切此鑿字自如字讀如

鑿石鑿渠之鑿本無罅徑強用力以求通如人性本無惡却強說惡就桀紂之喪失其性者鑿之成理名之曰性以曲成其說而使之通則唯非已然之迹而其不順利也久矣若禹之疏濬決排則俱在故有底水道上施功終不似夫差煬帝李垂賈魯強於高原平地上鑿一河以挽水使入只此字喻極切加穿字則失之矣

已然之迹謂可見之徵也潛室云善惡皆已然之迹一句足折羣疑乃均此已然之迹而或利或不利此正在當身體會若但據迹以爲徵則雖有其故而不利者多矣故天下之言性者云有善有不善則有堯舜微比瞽瞍象紂以

爲之故云可以爲善可以爲不善則有文武幽厲以爲之
故蓋繫以言性而性若實然則繫以言故而故亦有其可
徵者矣唯反而求之以自得之則利不利以別此陳迹不
足盡恃而唯心理之安者爲有本也性藏於心安於心者
爲性之真猶夫厯因於度數順於度數者爲厯之合仁山
不知此乃謂苟求已往日至之數則將來者可坐而定則
是但有故而即可定不論其利不利矣充其說則桀紂亦
已往之徵也其亦可定性之惡矣千歲之日至一句自兼
已往將來說厯家亦無板局故無可執之陳迹而務求之
求者求其利也如歲差之法雖始於何承天虞翻乃杜預

所推春秋長麻往往與後人置歲差之麻合轍想古法固有進退增減唯如劉歆三統執定一十九八十一遷就以使必合則拘於故而不問其利不利強鑿之以求通也古今麻法唯郭守敬爲得理用天而不用人晷景長極便是冬至短極便是夏至麻元在數十年之內周天定於萬分因其自然之利而盡撤黃鍾大衍之死法方與孟子言性就當人之心四端上求故一理若旁引陳迹不必其固然而執以爲固然未有能利者也仁山之論麻王安石之同河荀楊之言性皆守故而不問其利鑿而已矣禹稷顏子一章只集註說得好諸小註皆過高而無實和

靖竟以時許三賢亦非愚所敢知章內說禹稷處詳說顏子處略則疑顏子之但安貧不仕便是時措合宜慶源只就出處上說無偏無倚無過不及試把聖賢致中和之全體大用說得容易南軒謂此卽是聖賢之異於楊墨夫楊氏之失雖同室鬪而不救墨氏之病雖鄉鄰而必披髮纓冠以救之固也乃卽楊之爲己豈其足以與於顏子之樂墨之兼愛豈其合於禹稷之心則聖賢之異於彼者不但一或出或處而盡之實有其學術德業之不同本異而末亦殊也若以顏子不仕亂世而卽合乎無偏無倚無過無不及之時中則與禹稷同立於唐虞之廷若岳牧百工以

下汜乎共驩及夫危亂之世嫉俗自貴而不仕若沮溺丈
人以泊乎莊周列禦寇顏蠹陳仲子之流而皆時中矣集
註各盡其道及退則修己八字是扼要語且不須擡高論
到大本達道一貫時中去而顏子不改其樂唯此一樂是
與禹稷同道底真血脈不可以煒煒紫芝可以忘飢眾鳥
欣有託吾亦愛吾廬者當之若但瀟瀟洒洒全性命於亂
世正使有爲只做得管仲樂毅已足何曾得見禹稷項背
來此須兼以論語集註中所樂何事求之孟子於萬物皆
備反身而誠處見得此道流動充滿外不以世移內不以
事閒無非以體入德而凝王道故曰禹稷顏子同道唯然

故其開戶也實有以異於楊朱之閉戶其往救也實有以異於墨翟之往救而隱則爲沮溺出則爲管樂者皆不足云矣知此則慶源喜怒應感之說猶水上打毬了無泊處蓋亦不足爲有無矣

萬章上篇

舜之處象與周公之處管蔡其所以不同者先儒論之詳矣然所謂管蔡之叛憂在社稷孽在臣民象之欲殺舜其事在舜之身此語亦須分別看非謂一身小而社稷臣民大也使象惡得成則天下且無舜而昏墊之害誰與拯之舜之一身所繫固不輕而以亂天下萬世君臣兄弟之大

倫者又豈細故此處只論舜與周公所處之不同更不論
象與管蔡罪之大小與事之利害到兄弟之性更以利害
較大小則已落私欲若以罪之大小言象之親弑君親又
豈可以禍不及於臣民爲末減哉聖人之敦倫盡性只是
爲己故舜於此且須丟抹下象之不仁不商較其惡之淺
深害之巨細而唯求吾心之仁故象唯欲殺舜則舜終不
得怒而怨之管蔡唯欲危成王之社稷故周公不得伸其
兄弟之恩以兄弟之恩視吾君宗社之存亡則兄弟爲私
以己身之利害視兄弟之恩則己身爲私總爲不可因己
身故而藏怒宿怨於兄弟故不特不忍加誅而且必封之

若其比肩事主而借兵端於我以毀王室則雖未至有安
危存亡之大故而國法自不可屈故孟子言瞽瞍殺人而
舜不得禁皋陶之執若象以殺舜爲事事雖未遂而弑械
已成其罪固浮於瞽瞍之殺人也遠甚藉使皋陶欲執之
以抵罪則舜必禁之矣雖云聖人大公無我然到此處亦
須炤顧自己先立於無憾之地然後可以立情法之準世
儒不察便謂聖人概將在己在人作一視同等無所分別
無所嫌忌但以在彼善惡功罪之小大爲弛張而曰此聖
人之以天地爲一體者也爲此說者蔑差等以直情而徑
行其與異端所云天地與我同根萬物與我共命一流荒

誕無實之邪說又何以異所以聖人言禮必先說箇別嫌明微以爲義盡仁至之效若於所當避之嫌一概將在己在物看作一例卻向上面辨理之曲直害之大小卽此便是人欲橫行迷失其心胡文定傳春秋謂孔子自序其績與齊桓等爲聖人以天自處視萬象異形而同體亦是議論太高不切實處使孔子視己之績如人之績美詞序之而無嫌則舜可視象之殺己與天下之殺其兄者同則又何待其害及於宗社臣民而始加誅哉堯授天下於舜則舜必讓之如但以社稷臣民爲大則安社稷綏臣民者宜莫如舜胡不慨然自任而必逡巡以遜耶象之欲弑舜也

蓋在舜未爲天子之日故小僞得以孽害之小大立說向
令舜已踐帝位象仍不悛率有庠之不逞以圖篡弑豈不
與管蔡之流毒者同將爲舜者遂可俘之馘之以王其辜
耶使然則漢文之於淮南且但遷之而未嘗加辟然且尺
布斗粟之譏千古以爲慙德然則使周公而身爲天子其
不可加管蔡以上刑亦明矣夫周公者人臣也不得以有
其身者也身不得有故兄弟亦不得而有兄弟之道視乎
身者也非父母之比也不得有身斯不得有其兄弟得
有其身則得有其兄弟矣身所有之社稷身所有之臣民何
患乎無君而又何患乎亂之不治乃虧天倫以曲全之是

猶剝首以救膚割肌以飽腹也不亦俱乎

百姓如喪考妣

喪如字謂以父母之服服之

四海遇密八音書有明文

帥天下諸侯爲堯三年喪孟子之釋書又已分曉古者民不得稱百姓至春秋時始通稱之古之言百姓者皆賜氏而有姓者也周則大夫世官而賜氏夏商以上唯諸侯爲有姓如喪考妣者卽所謂帥天下諸侯爲堯三年喪也若此黎之不得以父母之服服天子自理一分殊天理自然之節文與諸侯之不得郊禘庶子之不得喪其母支子之不主祭一例故曰刑不上大夫禮不下庶人且禮也者文稱其質物稱其情者也天下之大萬民之眾知愚賢不肖

之雜卽有君如堯可以感其哀於倉卒而必不能固其情於三年民之實也雖企及而必不逮者也乃毆天下而服三年之喪保無有斬衰非屢縱飲狂歌以經舞而以杖闕者乎則是亂禮喪真而徒媒其君親矣故於禮無庶人服天子之文其言百姓者實諸侯也漢文短臣子之喪而反令庶人同制二十七日之服薄於親而厚於疏亂上下之別其悖甚矣南軒以天下臣民爲言亦未可與言禮也人君爲不善而天命去之於命言之則非正命於天言之則自正於人之受命而言之則非正於天之命人而言則正惠迪吉從逆凶作善降之百祥作不善降之百殃此正

天命之正也南軒於此辨得宋精舜禹之相歷年多自是
正堯舜之子不肖自是不正故朱子說本是箇不好底意
思被他轉得好了總之正不正只可於受命者身上說不
可以之言天天直是無正無不正也故乾之四德到說貞
處卻云各正性命亦就人物言正天地不與聖人同變本
體上只有元亨到見功於人物上方有利不利貞不貞利
貞於此者或不利不貞於彼利貞於彼者或不利不貞於
此天下無必然之利一定之貞也堯舜與天合德故於此
看得通透子之不肖而不傳之本不利而非正卻順著天
用他所利所貞者吾亦以之利而得其正則所謂各正性

命保合太和乃利貞矣然此道唯施之于則可若舜之於
父母則不然號泣於昊天於父母不受其不正也舜之有
父有子皆命之非正者特舜或順天或相天一受之以正
耳若桎梏死者天命自正受之不正也唯天無正無不正
故曰莫之爲而爲莫之致而至有爲有致而後可以正不
正言也天豈然哉

論舜禹益之避集註深谷可藏四字大啟爭辨自是立言
不精此豈避兵避仇之比且南河之南更有甚山谷如仇
池桃源也朱子抑云禮之常也乃是定論自堯以前帝王
亦皆傳子到堯時始有此君禪相攝之事則三年喪畢總

已事終自不得不避者禮之正也天下諸侯將迎推戴而出自是奇特非禮之所恆有則亦舜禹益之所不謀旣必不冀望亦不須防備君有適嗣之可立已亦有先君之顯命兩者俱有可立之理自無心於去留一聽之天人而已何容心焉想來有天下而不與之心亦如此則已純乎天理而無可加矣朱子卻又深說一步云唯恐天下之不吾釋益則求仁而得仁則又成矯異夫舜禹豈求仁而不得仁乎若必以天下之吾釋爲幸向後墜臥不起又誰能相強耶堯舜禪授之說愚於尙書引義中論之頗詳想來當時亦不甚作驚天動地看唯其然故益之避亦甚尋常天

下之不歸益亦甚平淡此處正可想古之聖賢廓然大公
物來順應之妙若謂唯恐天下之不吾釋則幾與越王薰
穴仲子居於陵一樣心胸雖可以砥礪貪頑而不足與於
天理人心之至聖賢心迹與莽操懿裕天地懸隔不但相
反而已欲知聖賢者當以季札子臧漢高帝宋孝宗諸葛
孔明郭子儀一流作對證揀出仁至義盡來方有合處
或問朱均不順一說極爲俗陋羅長源作路史似亦爲此
所惑舜禹當年是何等德業朱均雖不肖固亦不得不服
矣劉裕心同懿操唯小有功於晉耳然當其自立晉恭帝
且欣然命筆草詔況聖人乎有天下而爲天子不是小可

事云不順者乃似朱均可以手摩而襟繫之者然真三家
村學究見地也上世無傳國璽如漢元后之可執留者不
成朱均介馬孤立大聲疾呼以爭於眾曰我欲爲天子邪
俗儒樂翹異以自鳴亦不知量而已

慶源遠而去近而不去之釋兩而字下得不分明此是通
論聖人處未仕之前就之爲近不就爲遠既仕之後義不
可留則去道有可行則不去倘作一串說則不特孟子爲
敷衍駢贅之句且旣已遠矣蓋未嘗來而何得言去方其
近也且自立於可去可不去之勢而亦何得遂定其不去
耶

呂氏說有命無命處極精當正從孟子求之有道得之有命上體出顯義命之異為後見其合南軒云禮義之所在固命之所在雖與呂氏小異然亦以見禮義之所不在便命之所不至也新安錯看得之不得曰有命將不得亦作命說不知命字自與理數字不同言命則必天有以命之矣故中庸註錄以差除詰勅擬之既不得矣則是未嘗命之地孔子曰有命者謂我若當得衛卿天自命之也得之不得曰有命者言當其不得則曰我若當得則天自命我而今未也故曰求之有道得之有命道則人有事焉命則天有事焉之詞若不求則不可以道言不得則不可以命

言矣或疑孔子以道之將廢爲命孟子抑曰莫非命也則不必受命得位而後可以命言矣乃孔子之言廢者則既得而復失之詞孟子之言莫非命者則以言乎吉凶禍福之至猶朝廷之一予一奪皆有誥勅以行其令也唯吉凶禍福大改異處故以天之有所予奪者而謂之命若人所本無因不予之人所本有因不奪之君子於此唯有可行之法而無可受之命故謂之曰俟俟者未至之詞也藉當居平無得無喪之時而莫不有命則更何所俟哉故生不可謂之命而死則謂之命以其無所奪有所奪之異也不得不可謂之命而得則謂之命以其無所予有所予之異

也若概乎予不亨奪不奪而皆曰命則命直虛設之詞而天無主宰矣君子之素位而行若概平生與死得與不得而皆曰有命則一切委諸大造之悠悠而無行法尊生之道矣且不得而亦言命則是得爲常而不得爲非常君子而以非常視不得也又豈非據願外以爲固有驚寵辱而生怨尤也哉天旣生人以後士則學農則耕天子之子則富貴士庶之子則貧賤日用飲食一切尋常事都不屑屑勞勞授之以命而唯人之自爲質此天之所以大而人之所以與能也世俗不知乃云一飲一啄莫非前定於是有一啖餚餐糕破枕蹂花之誕說以恣情放逸者之自棄使

然則立乎巖牆之下亦無不可而其自云知命者適以爲誣命而已矣是與於無命之甚者也而況義乎鑒於此而後知呂氏立說之精

萬章下篇

集註無不可事之君無不可使之民是伊尹胸中至大至剛語然須於此看出伊尹偏處其云至大至剛者言氣足以舉之也須與孔子天下有道某不與易自有分別伊尹但在自家志力學術上見得恁地有餘謂己有此格君救民之道更不論他精粗軟硬無往不成若孔子則直與天地生物一般須如此生生長長收收成成不徒恃在己者

有此可化可育可亨可壽之用君子之仕也行其義也說得極平易卻廣大高明無可涯際在孟子曰萬物皆備於我矣反身而誠樂莫大焉是學孔子處不徒以己有兼善天下之才爲本領也

孟子於聖上更加一智字已顯示聖功聖學更不容但在資稟上說若說資稟則人皆可以爲堯舜而況三子之於孔子使孔子而天縱以智爲三子之所必不逮則孟子之願學又從何處描摹耶子曰十室之邑必有忠信如某者焉不如某之好學不可認作託言以誘學者使然則夫子此語早已不忠不信矣學者於此處若信聖人不過則直

是自棄者不足與言夫射者之有巧力力固可練巧固可習皆不全繇資稟而巧之視力其藉於學而不因於生也爲尤甚總緣用功處難學之不易得庸人媮惰便以歸之氣稟爾朱子言顏子所進未可量又云緣他合下致知工夫看得有偏云云深得孟子之旨卽如伊尹在畎畝之中樂堯舜之道使且就堯舜之澤生民上著意及云使先知覺後知使先覺覺後覺也只在以其知覺覺天下上看得仁義之用則亦似未嘗向靜存動察中體備著位天地育萬物大合煞處分明至極也則使三子者以孔子之下學上達者爲作聖之功亦何資稟之可限乎三子之得爲聖

是他人欲淨盡天理流行故造其極而無所雜乃其以人
欲之淨行天理之所流則雖慙慙澈澈條達而一從乎天理
流行之順直者一運籌直做去則固於天理之大無外而
小無閒者不能以廣大精微之性學凝之蓋人欲之淨天
資之爲功半於人事而要不可謂無人力若天理之廣大
精微皆備而咸宜則固無天資之可恃而全資之人事矣
孔子吾十有五章自說得工夫何等縝密雖在知命以
還從容中道之妙非期待刻畫以爲功而其存養以洗心
退藏者要豈一聽之自然乎故孟子言聖智之事兩事字
恰緊與必有事焉之意同此或未察乃云爲學者言之則

聖人之聖智既絕乎人事矣學者乃以事學之豈非擬登
天而以梯耶夫射者之習爲巧也固有內正外直審幾發
慮之功學者之所必習亦羿之所必習也故人可使學爲
羿而豈羿之巧自性生爲人事所必不至者哉唯釋氏爲
怪誕亡實之論以欺人故裝點就未離母胎已證菩提墮
地七步唯吾獨尊一派淫邪之說聖人之道人道也君子
之學聖學也亦安有此耶故知歸三子之偏於氣稟蓋朱
門諸子誣其師之印可而非朱子之云然

東陽云此章聖字與大而化之之聖不同非也如伯夷求
仁得仁而無怨伊尹處畎畝樂堯舜之道幡然一改而伐

夏救民此豈更有未化者哉大而化之化與中庸之言變則化者固有在己在物之分然於己未化則必不能化物而不能化物者亦卽己之未化也如夷惠之流風興起百世之下伊尹格正太甲俾其處仁遷義則旣於物而見其化矣是豈其居之爲德者猶有所絀礙而不能達於變通者乎孟子曰伯夷隘隘似與化相反故東陽疑之而其實不然大同中之條理有其化一致中之條理亦有其化也人欲淨而天理行則化自順伯夷之隘固不與鮑焦申徒狄一流私意用事情戾疾物者等故鮑焦申徒狄滿腹是怨而伯夷不然求仁而得仁固已優游厭飫於天理之中

無往而不順矣。伯夷之隘隘亦化。故曰聖之清。伯夷之化化於隘中。則雖聖而亦隘也。孟子之答浩生不害於聖上。又加神之一位。蓋以三子爲聖。而孔子爲神。曰聖之時。則天天一神矣。易曰化不可知。化自有可知者。有不可知者。如春之必溫。秋之必涼。木之必落。草之必榮。化之可知者也。三子所得與之化也。物之品物流形者。而以各正性命。各正性命者。而以保合太和。元亨利貞用於至微而體於至顯。春夏秋冬有其定位。而無其專氣化之不可知者也。孔子之所獨也。孔子之異於三子。不於其廣大高明之性。而於其中庸精微之德。故以射之巧譬之。不能化則無

以行違猶射者之不能至如鮑焦申徒狄之清邵禹陶仇
之任東方朔阮籍之和行將去便與道相齟齬三子御一
直順行去更無跼蹐差池是可謂大而化之矣不知者乃
謂孔子能化而三子不能直將化之一字看得元妙無定
體唯孟子知聖之深則直在洗心藏密處揀出極深研幾
之妙蓋化之粗者便奇特亦自易知日月之廣照江海之
汪洋是也化之精者卽此易知處便不可知水之濶日月
之容光必照也兩者俱化而可知不可知分焉不可知者
藏之密也日新而富有者也何嘗有超陵變幻爲出於三
子所化之外別有作用也哉化則聖也不可知則聖之時

也化則力之至也不可居則巧之審中於無形者也以此辨之則以言三子之德也不誣而學孔子也亦有其津涘矣

不可知只是不易見非見之而不可識也人之所不易見者唯至精至密者而已雖云不可知卻是一定在如巧者之於正鵠然天之有四時其化可見其爲化者不可見若人所爲使太綱露出本領來分派下做作用賞則喜之形罰則怒之形儘他奇特都有跡在如伯夷之清其始如是則終莫不如是可以拈著掇著算定總爲他在粗枝大葉上布規模立軌則若天之有時綿綿密密而所以爲寒暑

生殺者總在視不見聽不聞之中孔子之不顯其德以爲
載於無聲無臭者下學而上達知之者唯天人在作用上
著心目則更無親切處也乃其所以示人則又無所隱而
若未有知者然非使人見之而不能測識之如異端之所
謂神通者比此以中庸小德川流大德敦化求之則庶幾
不差學者未到孟子知聖地位且就博文約禮上討線索
煞定仕止久速看他功用鮮不迷矣

程子以孔子爲乘田則爲爲司寇則爲孟子必欲得賓師
之位定孔孟差等如此說道理是將孔子竟作釋氏一乘
圓教四無礙看聖人精義入神特人不易知爾豈有於此

亦可於彼亦可大小方圓和光同塵之道哉孟子曰孔子
聖之時與易六位時成之義同豈如世俗之所謂合時者
耶春夏秋冬固無一定之寒暑溫涼而方其春則更不帶
些秋氣方其夏則了了與冬懸隔其不定者皆一定者也
聖賢有必同之心理斯有可同之道法其不同者時位而
已一部周易許多變易處只在時位上分別到正中正當
以亨吉而无咎則同也故孟子以論世爲尙友之要道孔
子之先自華督之難奔魯而仕於魯到鄒大夫時亦爲魯
之世臣矣春秋時世祿之法未壞而士之子必爲士而仕
者非有大故必於其宗國則孔子旣嗣鄒大夫之祿自不

得不仕乘田委吏爲職雖小而亦筮仕者初登仕版所必
循之階豈可以我有聖德而操一不屑之心乎古者五十
始爵乃命爲大夫周禮固在不容越也孔子之爲此自在
蚤歲義之宜道之正而豈故爲委屈耶孟子雖魯之公族
而失其祿位降在氓黎者已久魯穆平之世三家不復執
桓不復列其子孫於在廷矣孟子於宗國無可仕之階逮游道旣通則
已在五十受爵之年固不容自乞卑官以枉道辱己且齊
梁之君卑禮厚幣聘之以來若更自請散秩以受微祿不
承權輿而甘爲折節愈不可矣抑樂正子固云前以士後
以大夫則孟子曾爲士矣未嘗必得賓師而後仕也孟子

既以抱關擊柝爲祿仕之宜則其不必賓師之位者可見
孔子道不行於魯不脫冕而行則其處司寇者與處乘田
委吏之去就固不同矣聖人居上不驕在下不憂方必至
方圓必至圓當方而方則必不圓當圓而圓則必不方故
曰規矩方圓之至聖人人倫之至也而豈有方圓無不可
之理哉學者之大忌在推高聖人以爲神化不測而反失
其精義入神合規應矩之大經則且流於俗學入於異端
而成乎無忌憚之小人矣

朱子譏賈誼失進言之序斟酌事理允爲定論從來評賈
生之得失者未能及也古者大臣坐而論道以至庶人工

舊威可進言然庶人工替之所言者必非百官之所言小
臣之所言者必非大臣之所言也唯大臣所論者道則朝
廷之建立因革一切制治保邦文章度數須通盤徹底料
理一成局而陳之以授百工之作行若居言職者則必有
愆而後繩有繆而後糾方無愆繆且不可立意思逞議論
徒增聚訟有官守者則在兵言兵在農言農在禮言禮以
專治其事則利害親而言之無妄也至於庶人工替之諫
則又必國家顯著之事理介於得失安危之大在廷者蒙
蔽不以上聞而後可陳其一得以待採焉今誼所言者外
制匈奴內削侯王上求主德下正民俗以泊乎禮樂制度

正朔服色爲天子所操三重之權者巨細畢舉盡取漢家之天下畫一成局而欲竟授之有司遵而行之此大臣所從容坐論於燕閒之道而誼以疎遠小生輒以紙窓竹屋之所揣摩者握朝野中外以唯其所指使則是以天下爲僂得僂失試少年議論文章之物而可哉故知位卑言高急於自衒之罪不可以加之朱雲鮒謨鄭俠陳東直言敢諫之士而唯誼允當之而孟子之旨本以爲爲貧而仕者留一優游進退之局以盡其素位之道非概以出位而言責小臣而歸言責於大臣義自著明無容惑也不敢見禮也不可召義也一章之中縱說橫說乃於義禮

二字條理則自分明如云且云何敢云奚可云豈敢云況乎直惡清出禮有常經義繇事制唯合夫義之宜者則雖禮之所無而禮自可以義起如君欲有謀則就之堯與舜迭爲賓主一合於尊賢之義則當其行之不患乎禮之不中於節文而不必引君尊臣卑之禮以守其不敢矣若禮所本有則義卽不宜而一以禮之經爲宜如孔子非魯君之所可召而召必赴焉則禮有其常爲禮屈而非爲勢屈於義固宜抑不必據不可召之義以自亢矣禮義相爲錯綜以成經緯固有合一之理乃聖賢審物度已則必旣求之禮又求之義雖求之義亦必求之禮無不可者而後決

然以行其志此孟子所以不陷於一偏其以養君子之剛大者卽以定人道之高卑乃知王前士前貧賤驕人之說苟自矜厲以虧典禮而躡屣王門者旣以自辱其身而犯上干主其越禮踰分亦已甚矣註錄未悉

易位之事後世所以不可行者非孟子之言不可通於來今也霍光行之畢竟是胡亂蓋封建之天下自與郡縣異到秦漢以後天下事大段改易如此詫異事更不可倚古人行跡莽撞且孟子所言要爲諸侯言爾諸侯危社稷則貴戚變置之抑必上告天子下告方伯旁告四鄰可以相信相從而貴戚之卿雖首發策亦無嫌於犯上若夫天子

之不可易者非徒三仁不能行之於紂三代之末主之失
道者多矣從未有爲此舉動者蓋天子之於臣純乎臣者
也古者諸侯之卿命於天子則不純乎臣者也亦幾與今
之首領同不純乎臣而上又有天子可以請命則雖貴戚之卿易之
而實天子易之矣若四海一帝九州一王君雖不君誰敢
制命自己而徼幸以成非常之事哉委任權力亦何足恃
而可以爲三仁之所不敢爲乎此霍光之所以不學無術
而釀山禹之逆司馬昭桓溫所以爲梟獍之魁而不可道
也

讀四書大全說卷九終